

摘藻堂四庫全書薈要

集部

欽定四庫全書薈要

集部

御選金詩卷二

詳校官原任主事

臣

李斯咏

欽定四庫全書薈要卷一萬八千三百八十八

集部

御選金詩卷二

五言古詩一

蔡松年

漫成



人生各有適一受不可更違已欲徇世憂患常相嬰三
軍護漢將九鼎調蒼生功名豈不美強之輒無成朝昏
忘寢食俯仰勞心形何如從所好足以安餘齡予也一

丘壑野性真難名力懦謝提劍才拙慙窮經疎放已成
僻紛華誰與爭驚鹿便草豐白鷗願江清不堪行作吏
萬累方營營夜慮多俗夢曉枕無餘醒拄頰西山語適
意千里羹塵土走歲月秋光浮宦情欲語箇中趣知音
耿晨星世途古今險方寸風濤驚封侯有骨相使鬼須
銅腥誓收此身去田園事春耕

淮南道中五首

南楚二月雨淮天如漏卮畏途泥三尺車馬真雞棲却

思閒居樂雨具無所施高枕聽簷聲爐煙暈如絲

吾年過五十所過知前非顏焉日蒼蒼老境行相追
枯槔聽俯仰隨人欲何為歸計勿悠悠出處吾自知

南渡國不競晉民益瘡痍陶翁遂超然不忍啜其醪
北窗談清風慨望羲皇時道喪可奈何抱琴酒一卮

三年鎮陽遊春歸綠扶疎櫻筍媚園林日長閒枕書
行復當此時涼塵暗歸途會洗醪醕雪月波浮祕壺

鎮陽亘西南山河在圖畫花雨草煙間人家或僧舍
經

行每悵然真賞知未暇待予籃輿歸香火復蓮社

丁巳九月夢與范季霑同登北潭之臨芳亭覺
而作詩記其事以示范

高陵五六松潭水涵清陰白鳥如避世巢居得幽深
花眩青紅苦節方森森何人作虛亭想像雲棲心我夢
涉陳迹君亦同登臨相與定嘉名洗去花草淫看雲撫
修碧夕景低遙岑風林淡秋月霜枝鳴玉琴兩意誰識
之好處煩幽尋閒居志則同歲月能駸駸時無陶彭澤

此曲難知音亭前有奇石遷流失山林顧亦如我曹髦
髮風沙侵小兒重外物列屋享千金區區心甚長因循
困華簪忽焉事大謬危機恐難任平生下車澤斯言吾
所欽志士願不辱俗情便孔壬自喜迹猶淺鳬雁容浮
沉泥行自蕭散世路皆崎嶇此邦真可老城郭環清潯
結廬與君俱開寫平生襟里巷日還往杖屨行謳吟還
尋夢游處無忘神所箴

庚申閏月從師還自潁上對新月獨酌十三首

錄十
一首

伊昔三年前淫雨摧行輶青燈忽今夕華屋映高秋華
屋亦何為百年竟山丘適意在歸與肉食非我謀

我家恒山陽山光碧無賴月窟陰風篴十萬瀉澎湃茲
烏有樂地不去欲誰待自要塵網中低眚受機械

我本山澤人孤煙一輕蓑功名無骨相雕琢傷天和未
能遽免俗尚爾同其波梧桐喚歸夢無柰秋聲何

孟夏幽州道上陘車輾輾旌旗却南行飛電隨馬足行

窮清潁水不辨洗蒸溽吾生豈匏瓜一笑為捧腹

燈花何太喜似報天雨霽客情念還家如瞽不忘視到
家問松菊早作解官計青鏡髮蕭蕭及此霜雪未

鳴蛙屬官私庸兒固可笑江山本誰爭但苦歸不早物
情閒始見宛轉為君好區區乞鑑湖多事憐賀老

天下任之重人物古難得誰為經濟才有亦未易識吾
曹與雞鶩官倉等伏食行將問征途滿眼西山碧

懦微莫如我往往從險艱譬之驅山麋八鑿困天閑豈

惟物違性成功亦良難風煙念何地野水長松間
出處士大節倚伏殊茫茫絕交苟不作自足存嵇康哲
人乃知樂曲士迷其方顧我類社櫟匠石端相忘
問舍前年秋已買潭西地高明鬼所瞰聊取風雨蔽瀕
溪樹嘉木成陰十年計仍當作茅舍名之以今是
斯言已饒饒要未離憂患何時但飲酒臧否了不關不
飲逝者多秋草麒麟間懷哉竹林人吾方仰高山

七月還祁

洪河注天南兵氣橫高穹我從兵前來歸心疾驚鴻官
柳未搖落蓮荇香濛濛吏舍在前邨舊年養疎慵爰自
三軍去青苔瘞人蹤夕陽叩柴門歡迎來僕僮濁酒古
壘洗停觴問新松却對一牀書睡鴨孤煙中土花暈湖
玉冰絃冷霜桐燈花未可親露坐茅堂東西山月中淡
夜茶煮松風到牀便安寢不復知晨鐘平生幽棲心斯
言畧形容人道動有患百態交相攻而我觸類真冶容
鄙青紅非才見臨事叩之輒空空知難不知回飄流劇

飛蓬暫去聲利場樂佚猶無窮況於得行意瀟灑畢此
躬勿為才者傳從渠作夔龍

吳激

病後寄開甫

暗蛩咽幽響隙月漏微光溪上風雨過脩然有餘涼病
瘦鶴骨立低垂不能翔懷我中山兄開經焚道香猿嘯
耿清夜鐘鳴悠夕陽商秋早晚至夢寐松楸蒼

夜汎渦河龍潭

輕舟弄素月靜夜橫清渦天風毛髮亂疎星燦明河圖
經記父老冥冥年歲多淵沉三千丈湛碧寒無波微流
帶文藻絕岸無柔莎炯如帝鴻鏡可鑑不可磨中蟠至
神物役使羣蛟鼉蜿蜒頭角古勁鬣誰敢廟深宮照珠
貝頗費蚌與螺何時葛陂竹化作陶公梭

宇文虛中

庭下養三鴛鴦忽去不反戲為作詩

先生久忘機為爾虞矰繳一朝長羽翮萬里翔寥廓誰

信惡溝塢忽作華表鶴豈無三玉環遺音嗣黃雀

高士談

梨花

中原節物正梨花配寒食黃昏一雨過滿地嗟狼籍塞垣春已深花事猶寂寂朝來三月半初見一枝白爛漫雪有香瓏鬆玉仍刻芳心點深紫嫩葉裁輕碧懶慢不出門雙瓶貯春色殷勤遮老眼邂逅慰愁夕一尊對花飲況有風流客酒闌思故鄉相顧空歎息

予所居之南下臨短壑因鑿壁開窗規為書室
坐獲山林之趣榜曰野齋且作詩約諸友同賦
我本麋鹿姿強服冠與簪束縛二十年夢寐遊山林竭
來古晉國官舍南城陰鑿壁取疎豁開窗舒滯淫山光
射几席野色供登臨怡顏盼庭柯明目增遙岑草木遞
榮落雲煙自浮沉翫彼物色變感此歲月侵兀坐獨無
人窺簷囀幽禽誰知城市中閨若郊居深巷陋顏子樂
地偏陶令心一室亦何有狼籍書與琴晴暉朝徙倚皎

月夜相尋欲賦畔牢愁先為梁父吟詩成輒自和酒熟
時孤斟結茅會有期種竹當及今日來官更忙塵埃滿
衣襟暮歸惟憊卧筋力殊不任常思返丘壑豈願紆朱
金遙知北山處猿鶴餘清音

邊元鼎

早春

春風走塵沙鳥語滿京國東皇發潛潤土木變顏色桃
李爭嫵媚白紅詫容飾惟有松柏姿依然蔽崖黑

張斛

平安關道中二首

高林俯青冥柯葉森若織陽光已轉午陰嶺仍半黑崢
嶸亂石間行子有苦色臨深地勢入涉險天宇塞四顧
無所投迹繭去未息悵然增百憂冥冥羨歸翼

窮冬十日陰積雪千山路晴雲開半嶺落日猶在樹悠
悠客心速慘慘天色暮寒鳥各有依解鞍尚無處游魚
誤銜鉤元豹終隱霧行行謝冠冕復我林壑趣

馬定國

懷高圖南

劉义一狂士尚得韓愈知君才百劉义知者果其誰三
隨計吏貢躡屨遊京師文章善變化不以一律持碧海
涵萬類青天行四時去年高唐別河柳搖風枝今年清
明飲高花見辛夷茲來又幾日軍檄忽四馳尺書無處
寄相見果何期白日鬪龍蛇黃塵笳鼓悲春風獨無憂
吹花發江渚一杯送歸雁萬里寄相思

讀莊子

吾讀漆園書秋水一篇足安用十萬言磊落載其腹北
風熟粗梨冷日照鴻鵠人生固多事端坐至秉燭

張子羽

遊龍門訪潛溪僧舍

入谷訪精舍鐘聲先遠聞陽光時翳竹泉脈俄當門山
僧禁足久瞑目誦微言要知鹿臺寺但指山頭雲策杖
御枯西幽蘭秀荆榛風煙浩難及薄暮花紛紛

宿寶應

重巖煙靄合寶閣春風暮山深月影遲坐久識歸路伊
昔府中彥征驂同夜駐徂年能幾時變滅等輕霧禪房
伴茗飲豈待酒中趣卧來清不寐瘦鶴驚宿露黎明覓
舊題松間宛如故

吳縝

寄定國

情馳夏日流目斷晚雲碧新詩從何來遠自金馬客雄

深作者意奔軼古人迹名高四海望髮未一莖白應嗤
窮途士抽簪老泉石采蕨在南山驅牛向東陌勞生豈
不苦衣食迫晨夕膏粱無宿懷茅茨得真適卒歲將何
求一飽惟力穡

訪國城石氏

昔我訪君處樹涼炎暑收今君訪我來城空殘雪留經
時少乘興兩至皆空投茅茨隔溪上車馬度城頭不聞
機杼聲但聽溪水流向來方圓翁曾訪此中遊近聞大

梁至京塵滿衣裘相思懶歸步落日風颭颭

山居

西首魚山崦北連黃石祠崇岡在東南我家山北陲地
僻少人事終朝掩柴扉尊酒不常得書券聊自怡春風
數日來處處生蕨薇寸心復何累一飽良可期當年終
南人捷徑以貽譏知我無心者豈顧悠悠辭

擬淵明貧居

淒其歲云暮北風無時休晨興倦薪水夜寐乏衾裯缺

月正裴回宿鳥鳴啁啾欲無憔悴歎奈此霜霰秋松楸
脫兵火環堵且淹留閉門念袁安守賤弔黔婁坐讀貧
士詩吾乃淵明儔

溪上招王仲先

幽居復何為冬來性成懶柴門俯清溪寸步出亦罕今
晨偶攜杖愛此晴日暖寓目隨所之行到南溪畔背陰
雪猶積向暖冰全泮搯頤卧石上仰面蒼崖斷泉聲何
從來乍喜兩耳換平分意甚遲斗落勢方悍坐來百慮

金方口小卷二
忘還惜日景短塵寰多憂虞中林足閒散故人戀明時
歸休苦遲緩幅巾來何時臨流話幽款

朱之才

寓言二首

獸有善觸邪草有能指佞獸草非有心不移本天性前
王著臣冠俾爾効端鯁如何不稱服觸指反忠正吾欲
取二物豢植列臺省一令邪佞徒奔逃亟深屏

風雨晦時夜雞鳴有常聲霜雪枯萬榦松栢有常青內

守初已定外變終難更若人東世利浮沉無定情俯仰
効桔槔低昂甚權衡反出木鳥下徒為萬物靈

謝孫寺丞惠梅花

我來泗水上居與墟墓鄰彌望多棗栗礙眼皆荆榛忽
忽度歲月不知時已春朝來佳公子遺我梅花新秀色
照窗几妙香襲衣巾莽如瓦礫場驚睹瓊瑤珍念昔客
江南千樹臨江津吳儂不知貴但與桃李倫自從墮東
土夢繞江之濱歎彼和鼎實亦復生不辰窮愁坐空山

豺虎雜鳳麟此贈意不淺難為俗子陳

卧病有感二十韻

臯蘇粲園英澤芝紛水葉赤弁舞纖肌黃袍緩老頰鳴
飛各有適吾獨嗟衰繭齒髮久已疎又復失調燮梁肉
謝鼎俎參苓富巾篋葵扇風未來桃笙汗初浹呻吟和
哀蟬夢寐追化蝶撫枕念平生世故飽更涉弱齡負奇
志胸蛻盤煒睦夜篋傳巖訪朝待渭濱獵荀爽歲九遷
康侯日三接功業著鐘鼎聲名垂史牒那知事大謬舉

趾得躋跼多難集暮年百願無一愜寒灰消寸心清淚
腐雙睫坐令孤鵬騫化作瘴鷯跼憂來復自慰人生幾
蕸英呼吸過百歲俯仰失千劫垂流須縱擢遇坎即停
揖些語不成騷商歌鼓長鈇

水月有興

明月落湖水天淵體俱一浩蕩碧琉璃奩此寒玉壁微
風觸湖波合散作六七浮光逐水紋金蛇勢盤結人心
湛寂初與月同清質外累一汨之萬態紛殊迹因知養

心者無為風浪失

劉著

次韻彥高占雪

天秋鼓南風雲海飄暮雪三春猶沍寒九夏那苦熱土
圭測中氣嘗聞先儒說窮髮多異宜泥古誠亦拙吳侯
擅六藝名宦端不屑晚歲登泰山早已探禹穴千歲可
坐致不待數旬月重陰畏坎陷五陽欣夬決君子方履
霜渠肯蹈覆轍雞猪與魚蒜幸可充朝餽

李之翰

書呈仲孚

造物固難量誰能計寒餓失馬乃為福夢牛翻作禍長
溪霜練靜修嶺蒼龍卧魂夢吾已安不勞歌楚些

白賁

客有求觀予孝經傳者感而賦詩

古人文瑩理後人但工文文工理愈暗紙札何紛紛君
看六藝學天葩吐奇芬詩書分體制禮樂造乾坤千岐

更萬轍要以一理存如何臻至理當從踐履論跋涉經
險阻鑽研閱寒溫孝弟作選鋒道德嚴中軍仰觀及俯
察萬象入見聞不勞施斧鑿筆下生煙雲高以君唐虞
下以覺斯民君如不我鄙時來對爐薰

姚孝錫

東軒琴示兒子沂

古人無復見但有東軒琴一鼓高山操因窺古人心正
聲久沈埋俚耳喧哇淫正可自怡悅不須求賞音

趙慤

擬古

春風動地來依依燒痕青王孫行不歸離恨何時平
翩誰家兒曉獵開紅旌雕弓插白羽怒馬懸朱纓圍合
意氣雄厠養厭庖烹人生一春草時至何足榮君看五
陵樹日暮悲風生

蔡珪

讀戎昱詩有作二首

我家北潭邊溪流卧衡門俗客自不來好客時開尊路
人或不知云是渭南村底事半年別此懷誰與論

來時西郊林木末秋未老借箸數歸日迺復見冬杪心
馳倚門望望我綿綿道慙愧戎子詩在家貧亦好

風竹如水聲

好竹風淅淅流水聲泠泠吾廬兼有此要是佳友生北
窗午夢斷冷簟無飛蠅端疑故人至喚作寒泉鳴攬衣
起徘徊自笑還自驚無須問形似自可名雙清

荷香如沉水

新荷翠參差十畝藏漪瀾臨風倚雲蓋過雨驚珠盤夕
陽香四來坐我西闌干三徑未論菊九畹空羞蘭聊分
海南珍炷之古博山誰能品優劣待以季孟間

鄰屋如江村

斜川一壺玉川東三四家籬落半流水茁茁青蒲芽我
為水邊游月魄舒晴華隔離見燈火兒語時紛拏想像
澤南州寄興棲雲霞從渠非知音我意亦自嘉

劉汲

題西巖

人愛名與利我愛水與山人樂紛而競我樂靜而閒所以西巖地千古無人看雖看亦不愛雖賞亦不歡欣然會予心卜築於其間有石極峭峻有泉極清寒流觴與被襖終日堪盤桓此樂為我設信哉居之安

平涼道中

青山烟無塵塵滿行人衣行人望青山咫尺不得歸吾

歸不作難世故苦相違何當臨溪水一洗從前非

南園步月

雲橫樹外山樹映山巔月微風拂寒枝疎光散清樾幽
歡難相遇此景安可忽從來山水心不為塵埃沒

郝俟

聽雪軒

扶疎窗外竹歲暮亦可愛蕭散軒中人高節凜相對清
寒入夢境風雨號萬籟覺來聞雪落淅瀝珠璣碎飢腸

出佳句疊疊入三昧華堂沸絲竹此樂付兒輩

任詢

西湖

西湖環武林澄澄大圓鏡
仰看湖上寺即是鏡中影
湖光與天色一碧千萬頃
堤徑截煙來樓臺自昏暝

馮子翼

岐山南顯道冷香亭

溪橋小雪晴水村霜月冷
暗香林薄間得偶璀璨影殷

勤南夫子移植在人境
芝蘭馥氤氲珠璧照光炯
小屋茅草蓋幻此瀟洒景
看花蒸松明醒醉漱苔井
文章聊嬉戲辭氣頗馳騁
州縣不著脚時人笑清鯁
我官西州掾簿領不知省
頻遭官長罵勢屈石在頂
門庭可張羅陋巷車轍靜
山歌聽嘲哂舞伎或瘤癭
引睡閱文史朝日無從永
夢到五柳莊身居六盤嶺
竭來南山下旅思淒以耿
金壘照衰朽玩味得俄頃
傍人怪迂疎佳處當自領

張公藥

許下三庚劇暑甚於他州懷思故鄉嶧山山水
真清涼境界也感而作詩

魯東百里近福地日晷繹千峰開玲瓏絕澗瀉湍激岱
宗古獨尊象緯了不隔

嶧山至泰山不遠

此山許攀聯朝著有

班秩虛巖互霞尉秀石森玉立泉聲動環珮林樂盡竿瑟

林樂出莊子

樹老潤饒菌果熟香隕實漱風松落花泓雪崖

溜蜜木駮虎磨癢沙迴鳥伸翮

水禽嬉戲引吭伸翮劉禹錫集

竹葉若

來往桃源當甲乙曾經晉人隱

晉郗鑒因避亂挈充人來嶧山事見本傳

喜

脫塵網密事往不記年人說猶前日我來官許下觸暑
病逾劇慢膚便枕簟白汗沾巾幘屢輟五夜眠輒廢中
盤食炎官令方虐著意不憐客語此作惆悵可以知得
失遙知舊經行雲起水邊石平生二三子相對坐橫策
今世葛天民何容挽之出

党懷英

穆陵道中

沂山一何高羣峰鬱孱顏我行問遺老云此小太山望
秩有常祀其神號東安草荒穆妃墳雨剝漢武壇神仙
果何在可想不可攀千里等一昔俯仰悲人寰東望蓬
萊宮咫尺滄波間

重山復峻嶺溪路宛盤盤流水滑無聲暗瀉溪石間岸
草淒以碧鮮葩耀紅丹高雲映朝日流景青林端我行
屬朱夏欲暘不得閒山中有佳人風生松桂寒

瓊花木后土像

皇媧化萬象賦受無竒偏胡為隨愛境亦為尤物牽煌
煌靈祠花玉藥冠春妍婉如傾國姝獨立江湖邊顧惜
怨奪移含秀梁宮煙青黃竟自冠始信擁腫全珍材歸
好事肌理緻且堅琢刻方寸餘遺像規汾壖願言稅靈
馭要復安所憐神游妙難詰豈以大小懸槐根開夢國
橘實游棊仙靜想寶龕中坐納東南天况有大者存指
顧超八埏

雪中四首

詩人固多貧深居隱茅蓬一夕忽富貴獨卧瓊瑤宮夢
破窗明虛開門雪迷空蕭然視四壁還與嚮也同閉門
撚鬚坐愈覺生理窮太工巧相幻要我齊窮通衝寒起
沽酒一洗芥蒂胸

翻翻雪中鴉飛鳴覓遺粟雪深不可求遶屋啄寒玉顧
我如鴟鵂多儲有餘肉我亦生理拙凍卧僵雪屋日午
甌無煙飢吟攪空腹豈不知屠沽肥甘隨取足幸待春
雪消吾猶多杞菊

歲晏苦風雪曠野寒崢嶸溼薪燒枯棘距刺相拏撐濃
煙久伊鬱微焰方晶熒津津膏乳漲中有蚯蚓鳴蓬蒿
掇快炬倏作飛灰輕餘暖未及愜睫淚先已盈幸有鄰
家酒時澆肌粟平

歲晏雪盈尺農夫倍欣然不作祁寒怨應知有豐年笑
我寄一室歸畊無寸田無田吾不憂飲啄當問天我看
多田翁租賦常逋懸低頭負呵責顏色慘可憐不如拾
滯穗行歌兩無牽

西湖晚菊

重湖滙城曲佳菊被水涯高寒逼素秋無人自芳菲
鮮飈散幽馥晴露墮餘滋蹊荒綠苔合采采歎後時
古餅貯清泚芳尊湔塵霏遠懷淵明賢獨往誰與期
徘徊東籬月歲晏有餘悲

西湖芙蓉

林飈振危柯野露委荒蔓孤芳為誰妍一笑聊自獻
明妝炫朝麗醉態羞晚困脉脉懷春情悄悄驚秋怨
豈無

桃李媒不嫁惜嬋媛悠哉清霜暮共抱蘭菊恨

浪溪別吳安雅

浪音郎

浪水清且白頻年照行役褰裳涉微波微波去無極悠
悠溪上山送我往復還與君臨水別幽恨寄山間

喜雨

山雲駛如驅山雨沛如傾幽人夢初醒卧聽簷溜聲雷
霆怒相搏似與陰陽爭蛟龍久何蟠始此幽蟄驚餘花
曉猶落竟日方破晴明朝東臯望照眼生意明焦枯被

沾濡相與迴春榮
忻然野桃李新綠
棲殘英漸漸麥隴
翠溜溜溪流青蛙
鳥亦解喜飛沈互
喧鳴萬物皆得時
棲遲感吾生直應
挂儒冠便逐春農
畊

題張維中華山圖

苾珠散遺曹我姓
出馮翊空聞華山
名未始見顏色三
峰擢觚稜經眼但
石刻那知玉井蓮
香落清渭北巔岕
劃變轉勢走關輔
窄豈無愛山人不
解傳粉墨多才曲
江喬公暇日招揖
歸裝貯新圖尚帶
煙霧溼明窗一傳

玩悅若到鄉國我生隨宦游久作東南客有田泰山下
繞屋皆泉石懷恩戀官廩老大歸未得况復秦川遙便
恐此生隔峻嶒蒼煙面只許畫中識詩成持送君想像
三歎息

途中

壬辰正月

平明發郊墟獨步踰蹢躅引領發前程日出煙未滅林
迴鳥始喧麥短牛已啣春陽氣未壯道左尚殘雪長風
拂歸袂凜欲變冬冽指凍僵不拳膠凝仍欲折而我竟

何事犯此寒正切修途去未幾行意先已繭安得兩翼
生高飛度林樾

劉迎

普照旃檀像舊物也方丈老人比以見還作詩
謝之

我昔遊京師稽首禮瑞像堂堂紫金身示現大法藏裝
嚴七寶几重疊九霞帳光如百千日晃耀不容望想初
法王子運力攝諸匠瓌材發神秘妙斲出智創風流蜀

居士翰墨老彌壯雷霆大地底音樂諸天上猶疑三十
二不具梵音相不知一點真正勝千語浪嗚呼五因緣
語綺反成謗我今獨何幸相見問無恙文殊本無二何
處覓真妄庶修香火供獲脫煩惱障天龍想驚喜訶衛
日歸向已覺海潮音人天會方丈

徐夢弼以詩求蘆菴輒次來韻

昔聞趙州老老大猶汎愛說法利人天機緣不勝載當
年鎮府話蓋以小喻大具眼領畧之於茲豈無待嗚呼

後來者見趣遠不逮又聞東坡公謫居飽鮭菜暮年海
南住几席溪山對自饌一杯羹老狂猶故態最喜霜露
秋味出雞豚外乃知作詩本口腹不無賴風流二大士
妙處無向背在家興出家相投若針芥先生今復然秀
句筆端快誰云修法供遊戲出狼狽一飽待明年桑麻
歌佩佩

再次前韻

神農嘗草木濟世以仁愛根源列郡出品目成書載中

云萊蕪根試驗頗為大昌谷嘔時須文園渴嘗待食異
地黃并効與蕪菁逮豈惟齒衆藥政自冠諸菜五州風
土宜罪布畦壠對墾鋤盡衆力封培窮百態翠角春雨
中黃花晚煙外日送盤箸資歲給瓶罌賴片玉出頭顱
層冰起膚背脆美掩蓴葵甘辛敵薑芥物生貴有用對
此一何快儲貯得沈涵棄遺免狼狽但足齊人餐何慙
楚臣佩

送劉德正

驥駉蟻垤空莫干犀革斷人材必超軼物理乃融泮先
生廊廟具冰雪自湔盥十年處繁劇風力濟詳練堂堂
八面敵了了一笑粲雲中國西邑食貨資轉輓中臺輟
之去正倚咄嗟辦從容九年蓄作想坐鞭算向來鹽鐵
使緒業著家傳春朝觀上計廣廈奉閒燕行矣需詔除
鵷行聳榮觀

盤山招隱圖

溪山不難買所費千金儲不如數峰雲朝昏對吾廬交

游豈無人轉盼傷離居不如吾兄弟相應如笙竽左侯
薊名族溫溫器璫璵身雖市朝寄心與功名疎伯也亦
可人文華炳於菟風神聳魁偉襟韻含冲虛平生一片
心緣塵不闕渠相期有幽事歲晚山林俱綠服照黃冠
歡呼奉親輿大婦侍巾帨中婦供庖廚諸孫戲膝前翩
然鳳將雛朝采南澗芹暮漉西溪魚煙霞入杖屨風月
來窗疏觀竹上巢雲禮佛登香爐紅龍雪浪湧白塢蒼
煙孤水絃寫天籟茶甌泛雲腴快哉天下樂俯仰餘何

須正恐左太沖招隱昔所無

寄題禹城孫氏茂德亭

濟南孫夫子養素抱絕識家有五畝園種樹如種德枝
葉深覆護根本飽封殖要令方寸地不著荆與棘流芳
被鄰里餘蔭連阡陌居然物隨化草木盡佳色河陽藝
桃李壽張蒔梓漆至今青史上相望如黑白乃知百年
用賴此一日積君今尚隱約白首勤墾闢人心亦天理
否泰有終極會待東風來吹春滿花國

南口

危峰張屏幃峻壁開戶牖崩騰來陣馬翔舞下靈鷲秀
色紛後前晴嵐迷左右重陰忽障翳虛籟競呼吼深迂
愛風日高亢捫星斗帝居望北闕村落當南口軍都漢
時縣遺迹奄存否中郎讀書處遺構想摧朽誰云用武
地經訓乃淵藪我家膠東潛樸學歎白首居鄰通德里
況此見師友慙無書帶草采采為盈手何以醉先生清
溪綠如酒

晚到巴達嶺下達旦乃上

車馬兩山間上下數百里縈紆來不斷奕奕似流水鯨
形曲腰臂蛇勢長首尾我車從其間搖兀如病齒推前
挽復後進寸退還咫尺心固安分尚氣或被指徐趨自
循轍躁進應覆軌行行非我令枕亦豈吾使倦僕困號
呼疲牛苦鞭箠紉如五更鼓相慶得戾止歸來幸無恙
喘汗正如洗何以慰此勞村醅正浮蟻

出巴達嶺

山險略已出彌望盡荒坡風土日已殊氣象微沙陲我
老倦行役驅車此經過時節春已夏土寒地無禾行路
不肯留奈此居人何作詩無佳語以代勞者歌

上谷

磨笄聳然來隰水洶而去山川俯城郭藩翰重畿輔桑
麻數百里煙火幾萬戶長橋龍偃蹇飛閣鳳騰翥傳聞
山西地出入此其路源源百貨積井井三壤賦葡萄秋
倒架芍藥春滿樹盤躋多布韋嬋娟半娥素永懷小靖

節厚德皆忠恕至今受一厘如昔歌五袴傷心隔生死
知己今有數歸日當驅車生芻奠其墓

蔡有鄰碑

我為山西行叱馭過近縣傳聞蔡有鄰石刻古今冠風
流書以來妙絕隸之變銀鉤鸞鳳舞鐵畫蛟龍纏憑誰
致墨本故舊詫珍獻正恐賦分薄一夕碎雷電平生六
一老集古藏千卷惜此方殊鄰公乎未之見

王庭筠

楊祕監下槽馬圖

龍眠悔畫馬政恐墮馬趣我今破是說試下第一句道人三昧手游戲萬象具萬象初莫逃畢竟無所住譬如大圓鏡照物隨其遇少爲物四散影果在何處楊侯具此眼透脫向上路萬馬落人間蓋證龍眠誤

張禮部溪山真樂圖

悠悠春天雲想見平時閒朝遊溪橋畔暮宿山堂間澹然不知愁亦復忘所歡出山初無心既出還思山人間

待霖雨欲歸良獨難山堂悵何許蕭蕭松桂寒

內鄉浙江張浮休霍尊為二兄賦

巖花覆我酒酒面照幽妍風如惜花影不肯生微連空
山悄無人花枝自留連懷人成獨醉日暮山蒼然

趙之傑

除月

日月不肯留歲歷倏云畢僧坊見節物新正在明日夜
半拊枕歎半百又加七形骸念念改膂力能不失經言

男數八比去才有一健者未可期况乃常衰疾物情忌
盈滿君子慎名實行矣安退閒吾其保終吉

趙渢

秋日感懷

歲月不相饒秋風颭已至蚊雷稍收聲團扇且復置久
雨不宜人新涼差快意數篇東臯詩引我北窗睡林泉
久隔闊塵土作憔悴但有適人適何嘗事吾事一貧既
忘懷所好無不遂世無陶靖節何人知此味

立秋

日月如川流去矣不復回萬物各有營榮悴更相催餘
生苦多艱壯志久摧頽念欲學還丹鬱紆殊未諧今朝
立新秋庭樹西風來舉首望天宇飛雲獨徘徊呼兒且
沽酒浩歌豁秋懷醉中得妙理逸興何悠哉

路鐸

芳梅如佳人贈襄城衛昌叔

芳梅如佳人不見令人思豈無桃李顏夏蟲篤於時霜

風靜天宇蘭悴菊亦衰凌寒一笑粲功烈如彼卑幾年
幽西路顙岡望逶迤思之不得見空吟水曹詩夜月將
夢去雲深水之潛邂逅疎竹邊我認風儀今日真見
止昨夢猶著龜塵中儻儼子謂我酷好奇逃空聞足音
此心胡不夷

閑閑堂

行邁已自勞坐忘猶有為動靜二塵耳一真非即離舉
頭見青山曲肱轉黃鸝心安萬境寂境轉何妨隨

題獻陵梁氏成趣園

舉世醉浮榮幽事誰肯尋譬如攫金人入市惟見金先
生厭塵雜靜念到園林數往徑自契有得樂更深春蘭
汎光風夏木貯清陰露菊挹佳色霜柯如本心淵明嘗
樂此意合無古今當其領會處豈止忘華簪先生比淵
明但欠酒與琴飯蔬有真味風籟有清音出處雖小異
要之俱陸沈我今志丘壑聊擬斜川吟

周昂

感秋

秋氣入行帳愁人中夜知雞聲與人語耿耿異常時清
晨起危坐感歎不自持義和馭飛轂往返無停期春草
如昨日已復悲離離顧謂鏡中髮爾衰安得遲結束娒
鞍馬荒山去委蛇黃花泣宵露綠野舍晨曦吾事久不
諧悠悠隨所之有懷南澗約敢賦北山詩

趙秉文

雜擬五首

朱明變氣候大火向西流六龍整征轡倏忽夏已秋閭
闔來悲風霜稜被九州豈不念時節歲律聿其周精衛
填溟海木石安所投獨攜羨門子高步登崑丘千秋長
不老永謝區中囚

白日淪西汜滄海無回波四時更代謝柰此遲暮何我
欲制頽光惜無魯陽戈憑高望八荒眇眇迷山阿驚風
振江海山林無靜柯獸狂走四顧曠野迷絳羅西登廣
武山北顧望三河蓬蒿蔽極目人少虎狼多喟然發長

歎拊劒徒悲歌

猗猗南山竹並生凡卉聚歲晏多霜雪見別蕭艾中我
欲食鴛鴦千歲不一逢留之和律呂截作嶰谷筒一變
為清商日暮來悲風清泉漉石根上有白雲封虛心抱
靜節知音為誰容不如歸去來一竿釣清澧

空齋日無事起坐橫鳴琴明月入我牖照見萬古心古
風不復還中有太古音置琴挂壁上吾道無古今

戚戚去故里辛苦從軍行黃沙翳白骨麟閣誰功名西

北秋風至日暮愁雲生火燒白草岡水斷黃河聲天寒
馬毛縮仰天為悲鳴男兒貴死難義重鴻毛輕南登雕
陰坂北望驃騎營駐馬千丈坡射鵰萬里程

秋日郊行

瘦馬兀西風節物遽如許雀噪晚禾場蝶飛秋菜圃桑
枯竅呼風槐老皮溜雨聞聲不見人隔林槓社鼓

初望少室

好山如佳士洗盡名利塵對之歛衽敬可愛不可親一

水刻我骨一石融我神何況三十六峰峰與天鄰仰看
青礚礚俯矚白磷磷因之攜畫本試寫蒼然真三日宿
其下舐筆不敢皴歸來閉閣卧枕上山橫陳題詩追所
見何必如古人

盧巖

龍潭石壁下鳥道盤青蒼飛泉從中來聲落讀書堂左
右洒石壁石上含宮商尚疑盧真君醉騎白鸞翔至今
明月夜飛下青山長去之五百載丘壑道愈光舉瓢飲

此水清風益難忘

過陸渾

言從陸渾去不過紫芝還
鳥飛不盡處夕陽千萬山
雲起動兼靜水流忙更閑
坐待石上月滅沒煙嵐間

望北山雲

浮雲起太行六合須臾間
清風相汲引吹我過榆關
歲旱不成雨悠然歸故山
向來無心出亦復無心還

江岸艤舟圖

遠村樹如薺近岸舟如月孤舟泊沙尾危檣見木末前
山景氣佳日暮涼風發時有渡頭人蕭蕭吹素髮

東坡赤壁圖

連山盤武昌古木參雲稠誅茅東坡下門前江水流永
懷百世士老氣蓋九州平生忠義心雲濤一扁舟笛聲
何處來喚月下船頭掬此月中水簸弄人間秋蕩搖波
中山光中失林丘古今一俯仰共盡隨虬蜉孫曹何足
弔我自造物遊尚憐風月好解與耳目謀歸來玉堂夢

清影寒悠悠一顧能幾何
鵲巢奄不留遺像不忍挂尚
恐兒輩羞儼然袖雙手妙賦
疑可求何時謫仙人騎鶴
下瀛洲相期遊八表一洗區中愁

倣王右丞獨坐幽篁裏

獨坐幽林下談元復觀易
西日隱半峰返照林間石
石上多古苔山花間紅碧
花落人不知山空水流出

和陶淵明擬古

小智多自私大方乃無隅
一毫納萬象萬象非卷舒
日

月為我牖天地為我廬曲士窘拘囚一身無容居我夢
登日觀青天入平蕪俯視但一氣二豪彼何如

吾道無緇磷萬古常如茲奈何中智下謂彼不知時與
世頗殊好譬彼澠與淄我欲質所從登高望九疑路逢
古漁父長歌滄浪辭出門異所見退坐還自思當世固
殊古古人不我欺翩翩出林鳥日暮將何之倚簷送歸
盡聊欲弦吾詩

西北有佳人樓上拊雲和一鼓別鶴操再弄求凰歌絃

聲幾欲絕哀響何其多昔為掌中珠今為路傍花壯年
不再得華落將如何

張衡詠思元屈平賦遠遊高情薄雲天意氣隘九州朝
攀扶桑枝夕飲弱水流翻然不忍去無女哀高丘嚴霜
下百草歲律聿其周蕭蘭共憔悴已矣吾何求

中秋

天風吹河漢明月懸清光清光不可掇流影入杯觴吸
此風露魄洗我冰炭腸向來功名心一笑雪沃湯人生

幾中秋彈指三萬場胡為置熱惱不使心清涼此心如
秋月虛明洞八方此身萬化中太山一毫芒尚無物與
我何者為彭殤推琴黃葉落矯首白雲翔解衣一盤礴
清境隨渺茫

九日登繁臺寺

九日獨何日寒花發幽芬波澄無餘滓天清廓遊氛鵬
盤翼迅風鴻響厲層雲我無二三友意適同酣醺南登
歌吹臺一弔信陵君捐軀赴趙壁談笑却秦軍夷門今

安在草沒侯嬴墳我亦感激士白首羞論文禁中有頗
牧慷慨志奇勲登臨送將歸無為愴離羣蒼茫視八極
煙靄何紛紛懷士撫長劒悵然日西曛

題東坡石鍾乳山記墨蹟

書為水
漬幾半

東坡謫齊安人怒天所許倒騎卧水龍醉踞石頭虎赤
壁萬里江一葉吾敢侮歸來抵湖口此樂乃并與扁舟
絕壁下鸛鳴如人語風雷相轟壓石水效吞吐山遺洞
庭樂帝下釣天舞石鍾不我欺一證萬萬古遺墨落人

間訛缺十四五糲糊魯壁簡剝落岐陽鼓蜿蜒半鱗甲
尚恐脫風雨晝移瓦棺壁劒化延平渚祝君什襲藏隄
防六丁取

中元夜祭太乙罷對月

今夕知何夕白露涵秋空褰衣踏明月如在瓊瑤宮細
數秋兔毫桂樹何璫瓏當年誰所種翳此天公瞳清光
知人意飛影入杯中流霞酌不盡清光清無窮我欲邀
白雲一訪東坡翁扁舟下赤壁此樂將無同疇昔縞衣

仙化作羽衣童酒酣邀我去鶴背聆松風

靈官夜醮餘香霧飛不起更衣步石壇風露浩如洗月
波走金蛇入我清尊裏引杯入復疑弓影正如此夜深
一鴈過歛見巾落几松間龍一吟風庭落松子空中步
虛聲隱隱猶未已

發棗社

夜發棗社驛寨帷見明月月照斷崖冰風吹陰磴雪山
重復峻嶺十步九盤折兩崖夾深澗線路僅容輶縑車

下千尺輾輾聲未絕坡陀到平地稍喜見雉堞隔城聞
鐘鼓星斗何厯厯故人相勞苦杯酒慰行役夜闌秉明
燭相對恍如失

過寧州

季冬落月黃霜雪原野白馳車上峻坂十步百夫力我
行未半嶺回視但木末白雲在高頂可望不可及北風
催去翼孤煙帶遠客居人候征騎倦僕望前驛倉皇下
坡陀張燈已昏黑

和淵明飲酒八首

翩翩萬里鶴日暮將何之昏鴉擇所安笑汝不知時孔
席不暇煖此理吾不疑尚愧淵明翁濁酒時一持

貧賤豈不苦仰慕冥鴻飛富貴豈不樂乃有黃犬悲苦
樂各異趣嗜好從所依我欲作九原獨與淵明歸挂冠
不待年况此齒髮衰遙酌一杯酒毋令寸心違

秋菊有至性霜松無俗姿采采黃金花笑拊蒼煙枝偶
有杯中物成此一段奇白雲南山來出岫復何為醉卧

東籬下聊脫人間羈

鷲鳥閉籠中舉翮觸四隅
騏驥駕鹽車跼蹐困中途
雖然遭識拔未免為人驅
傍觀信美矣自愧良有餘
不如兩無累還我田園居

千載淵明翁誰謂不知道
謾賦責子詩調戲以娛老
杜陵蓋自况亦豈恨枯槁
壺觴清濁共適意無醜好
歸來五柳宅守我不貪寶
長嘯天地間獨立萬物表

幽居淡無事雅志了元經
眼花憎文字悠悠竟無成
中

夜起不寐披衣守寒更梅竹散清影素月流廣庭孤鶴
閤逸響切切寒蟲鳴拊卷長歎息慷慨惻中情

漢儒傳註學未為世所得秦火少完書豈免烏焉惑後
儒補罅漏聖道少開塞俗士喜持戈又一秦相國且共
歡一觴多言不如默

淵明非嗜酒愛此酒中真謂言忘憂物中有太古淳回
首市朝中萬事牛毛新去年持使節悠悠過西秦宮闕
隨飛煙衣冠化埃塵當年憑軾士慷慨歎徒勤所以山

林客樂與魚鳥親
西登太華頂
曠望長河津
寄謝三山
雲聊欲濫吾巾
誓將從此去
笑謝當途人

和韋蘇州煙際鐘

近磴歛暝色
遠山猶夕暉
聲疑煙際起
復向煙中微
隨風散林野
渡頭人未歸

和韋蘇州遊溪

清溪霧氣散
水涵天影空
白雲翻著底
移舟明鏡中
鳥近前灘日
花移別岼風
遙知夜來雨
山色翠如葱

擬兵衛森畫戟

冠帶事朝謁清坐彈鳴琴以彼塵外趣遠我遺世心岸
幘送歸鳥隱几見遙岑聊同靜者樂豈必居山林

送麻徵君知幾

丹丘五色鳳一舉渺天隅文采瑞聖世不為竹與梧渥
洼汗血種逸氣凌九區可見不可繫白壁誰敢沽夫君
號神童七歲能草書二十工詞賦下筆凌紫虛三十富
經學兩魁天下儒蛾眉衆女嫉反畏知名譽一朝相捨

去顧以道自娛閑觀養性書洞究先天圖姓氏聞天朝

相公借吹噓

左丞薦

從容拜恩命移疾還里閭諸公惜其

去乞留侍玉除掉頭不肯住一飯吾豈無君看澤中雉
飲啄良自如一旦蓄樊中意氣慘不舒又如田間牛騰
擲適有餘被之以文繡顧影反踟躕君恩豈不重力疾
須人扶旁觀信美矣違已非病歟不如本無累還我田
園居喜君節獨高知君功名疎可以激頽俗可以勵貪
夫異時高士傳名與西山俱

御選金詩卷二

謹案第七頁前四行鑿壁取疎豁刊本疎訛棘係
沿中州集之訛據別本金詩改

第十九頁前二行觸暑病逾劇刊本觸訛濁據別
本金詩改

第三十二頁後六行眇眈迷山阿刊本阿訛河重
下北顧山望三河句韻據中州集改


第三十七頁前二行虛明洞八方刊本明作朗據
中州集及別本金詩改

第三十七頁後一行草沒侯嬴墳刊本嬴訛嬴據

戰國策改

謹案卷二第二十七頁後一行巴達舊作八達今
改後倣此





總校官庶吉士臣侍朝

校對官檢討臣蕭九成

謄錄舉人臣張昱

欽定四庫全書薈要

集部

御選金詩卷三

詳校官原任主事

臣
李斯咏

欽定四庫全書薈要卷一萬八千三百八十九

集部

御選金詩卷三

五言古詩二



鄴權

木犀

菊小未堪摘荒池悴芙蓉窮秋不慰眼幽獨將焉如殷
勤蕊宮子種桂庭之除垂閒弄餘花散落荒山隅從茲
雲月裔飄泊生江湖娟娟耐凍枝便與羣芳殊琉璃剪

芳葆蛾黃拂仙裾唾袖花點碧漱金粟生膚好風一披
拂九里香縈紆蘭蕙不敢友荃蓀正僮奴妄意此尤物
化工異吹噓不然九天香安得獨付渠託物寄深蘊古
今一三閭收覽名草木自比君子徒惟茲不挂口無乃
聖不居抑夫古簡編斷缺秦火餘君看齊魯臣史筆逸
其書惜哉不可曉臨風為嗟吁尤憐元祐前不及附歐
蘇末路益可惜例進宣和初仙根豈易致百死不一甦
昔遊汴離宮識此傾城姝摩挲三品石尚想狎客娛却

後十五年微霜半黏鬚一株再經眼相對憐羈孤不知
苦何事玉骨乃爾癯故人憐我老尺書遠招呼要趁秋
香濃共此碧玉壺遙知嬋娟客與我一笑俱

竹林寺矮松

蒼煙靄山曲回溪抱修筠中藏古佛宮荒僻無四隣靈
松插殿脚偃蹇今幾春何年霹靂雨抉石搜潛鱗謫重
飛舉難隨此蜿蜒身聯拳縮爪股氣屈不得伸卧枝重
無力支撐藉樵薪無風自悲吟失水固不神安知才不

才禍福了已分南山聳千嶂直幹排風雲正以中繩墨
中道遭斧斤豈知無用資千歲保其真何必求先容養
此老困輪我亦愛奇節歲晏守賤貧他時來汝伴露頂
挂葛巾

自鶴壁遊善應洹山

清晨發鶴山瘦馬陵峻嶺春風吹雪谷朝霧濕雲影羊
腸抱傾崖絕壑如下井硤關山却立老眼入絕境人家
跨清溪桑柘鬱數頃西行復幾里巖谷棲短景窮溪水

源清溜溜如細綆下流泉滿山勢合久方騁灘光落鏡
明嵐氣霏雨冷何年鑿青壁兩佛入禪定殘僧久零落
遺塏寄煙暝荒涼布金地雜還樵牧徑同遊成六逸轟
飲助高興留連更坐卧談笑發嘲咏感物復歎嗟醉語
忽逕庭青山不愛寶歲歲出礬礦公場沸千夫利井供
百鼎誰開爭奪源敗此丘壑勝頗思呼有力擲入萬里
迴天神定笑我癡絕謾生瘳長懷古畸人飛夢遶箕顓

楊雲翼

李平甫為裕之畫繫舟山圖間間公有詩某亦

絕作

名利走朝市山居良獨難況復山中人讀書不求官東
巖有佳致書室方丈寬彼美元夫子學道如觀濶孔孟
澤有餘曾顏膏未殘向來種德深直與山根蟠之子起
其門孤鳳騫羽翰計偕聊爾爾平步青雲端竭來遊京
師士子拭目觀禮部天下士文盟今歐韓一見折行輩
殆如平生歡舞雩詠春風期著曾黜冠五言造平淡許

上蘇州壇我嘗讀子詩一倡而三歎世人非無才多為
才所謾高者足詆訶下者或辛酸吾子忠厚資不受薄
俗漫晴雲意自高淵水聲無湍他日傳吾道正要才行
完會使茲山名與子俱不刊

龐鑄

漉酒圖

我愛陶淵明愛酒不愛官彈琴但寓意把酒聊開顏自
得酒中趣豈問頭上冠誰作漉酒圖清風起毫端露電

出形似神情想高閒大似揮絃時目送飛鴻難袖中有
東籬開卷見南山嗟予困塵土青髻時一斑折腰尚未
免敢謂善閉闕望望孤雲翔羨羨飛鳥還歸田未有日
掩卷空長歎

張建

擬古十首

飛雲何冉冉高與日月齊中有兩仙人盛服持玉圭我
欲從之遊天險不可躋邈焉望不及短日西山西

客從岳頂來貽我松粉黃為言服之久身輕欲飛翔我
嘗淡無味我嗅寂無香還君三歎息世好方膏粱

枯桑依頽垣摧折生理微剝我枝間葉備君身上衣葉
盡誰復顧棲鳥來亦稀君看牡丹叢日日笙歌圍

青青河濱柳柯葉柔且妍一從智巧萌戕賊為栝櫟器
成豈不佳天質失自然爭如河堤上濯濯披春煙

石泉何清泠中有九節蒲蒲性本孤潔不受滓穢汙一
移入城市生意寄泥淤翠葉日焦卷不霜而自枯寄言

守靜者勿涉奔競途

庭前蘭蕙窠三年種不成門外旱蒺藜一旦還自生第
恐傷我足鋤去根與萌如何一雨後走蔓復縱橫

有客曳長裾袖刺謁高閼低頭拜閭者始得通姓名主
人果厚眷開宴海陸并顧必承彼顏語必順彼情不如
茅簷下飽我藜藿羹

拳拳嶧山桐一樹十二枝枝分十二律所指各不移胡
為師襄子獨謂東南奇一律不可闕一枝不可遺誰能

以此意說似典樂變

美人何熒熒顏若苕之英絕世而獨立一顧傾人城三星正當戶俟我亦在庭之子無良媒不敢犯露行

丘中有一士顏貌清且癯緼袍僅蔽體蔬飯不滿盂時出蓬華門鼓腹歌黃虞不知何所得矯首望八區

馮壁

同希顏咏怪松

崧高地氣靈花木競妍秀玉峰西南趾有松獨怪陋偃

蹇如蟠螭奮迅如攫獸葉勁鬚髯張皮古鱗甲皺菌蠢
藤癭怒支離節節瘦月上蚪影搖風度雨聲驟子落慰
枯禪枝樛礙飛鼪盤根萬乘器平蓋千歲壽樵斤幸免
尋厦匠矧肯構龍化會有時天旱期汝救

王若虛

攄憤

非存驕蹇心非徼正直譽浩然方寸間自有太高處平
生少諧合舉足逢怨怒禮義初不愆謗訕亦奚顧孔子

自知名桓魋非所懼孟軻本不逢豈為臧氏沮天命有窮達人情私好惡以此常泰然不作身外慮

生日自祝

空囊無一錢羸軀兼百疾况味何蕭條生意渾欲失清晨聞喧呼親舊作生日我初未免俗隨分畧修飾舉觴聊自祝醉語盡情實神仙空無從富貴安可必修短卒同歸何足喜與戚一祈羸康強二願早閒適衣食無大望但願了晨夕萬事不我撓一心常自得優游終吾身

志願從此畢

李芳

留別

祿食媿踰量智困念歸愚符竹恒為累幸及引年初驅
馬國西門初服返田廬金閨富才彥絕足駛高衢眷我
謝朝幘冠蓋寵歸途豈不榮顧瞻亦踟躕煌煌丹
山鳳覽德萃清都行人得棲止老鶴青天孤石樓俯清
伊旁有野人居儻逢經過便山水足相娛

師拓

冬夜

雲破月穿牖夜嚴風號隙客子寢不安寒燈照空壁默
然不平事起坐長太息書但記姓名劒本匹夫敵追奔
幕前哲恢張濟時策何意造物兒重此稻粱役興酣氣
益振孤憤遠飄激非無南山雲高卧養虛寂茹芝酌懸
流嘯吟展胸臆聖達豈不念且有不煖席此抱誰與知
乾坤夜寥闕

破屋星斗入疎牖霜風生沉沉夜何久杳杳天不明燈
暗飢鼠出月朗棲鳥驚幽意苦盤礴厯落窮八紘貧賤
豈足戚所思天下英盤木無先容竟與枯朽并旃毳脰
纔掩藜藿腹不盈鬱鬱命世才何階伸一鳴僵卧蓬蒿
底要路誰為名恥作埽門謁寧為醴酒行直將叫閭闔
皎皎開寸誠白日下留照廓廓賢路亨此志恐未必搖
蕩熱中情

魏搏霄

田若虛遊龍門寶應用天隨子體賦詩因次其

韻

闕塞若廢馬奔騰多奇厖慙爾不可沮西來何慳慳駿
足忽勒破英才如拘龐有客善體物新詩留僧窗晏輩
豈足道微瀾生盆缸徑續杞菊意來浮玻璃江吏部昔
竄謫猶能題臨瀧況此六大字硯堂時鳴椿紫翠出萬
瓦天風旋珠幢興寄百斛鼎無才誰其扛會聽項籍約
吾將從之降

史肅

道傍柳

秋霜一何嚴凋此道傍柳殘枝幾葉在其勢不得久憶
昨三春時濯洗煙雨後弄姿舞婆娑勸我一盃酒別後
遽能幾忽忽成老醜人生非金石長短百年壽功名與
富貴於身亦何有古人隨物化今已柳生肘我獨何為
哉窮年事奔走長堤隱落月駐馬一回首春風柳梢黃
定得西歸否

元德明

家園假山

八尺飛來峰蒼然立於獨細看甲乙字疑是平泉族山
非一草石見石山亦足便恐東岫雲來我簷下宿今朝
鑿盆池明朝種松菊自笑住山人何時返巖谷

同侯子晉賦鴈

沈沈江浦雲浩浩朔漠雪微生幾寒暑翅老飛欲折樓
中見新過夕照送明滅歌枕數聲來疎窗耿殘月悲鳴

或天性南北隨所愜誰念孤旅人年年為愁絕

贈答彥文相過之什

程太原人

剝啄誰叩門開門得吾友握手一大笑慰我離羣久之
子富才具事業可力取瞻望青松姿衰遲愧蒲柳金閨
滿鴛鴦什伯自為偶寂寞林野人過從但鄰叟盤食無
兼味筍蕨才適口窮達俱偶然相逢且杯酒

枕上

往時見白髮談笑輕歲月誰謂明鏡裏蕭蕭不勝鬢山

林蹉跎久世慮初未絕觸物重興懷忽忽不自愜遭逢
有奇偶才用隨巧拙如何杜陵叟自比稷與契茫茫拊
塵編何時卒吾業

李經

雜詩

造物開巖地巖帳揜劒壁苔花張古錦霜苦老秋碧日
夕雲竇陰風鼓泉湧石馬蹄忌礲确樵道生枳棘盤盤
出井底回首悵如失長老不耐事底事挂陳迹披雲出

山椒白鳥表林隙

趙元

書懷繼元弟裕之韻

著龜不須問我命只自知多生隨宿業世網纏綿之驂
騶受羈銜大笑跛鼈遲跛鼈亦復笑縮首甘自卑何必
參漆園物理本自齊擯擲可消穀志士常苦饑穆之萬
人雄猶不免此譏我懦更多病區區欲何為鐘鼎不可
倖藜藿分所宜安能如黃蜂為人填蜜脾清白儻少汙

後人何所貽初學悔大謬篆刻工文詞年來厭酸醎澹
愛陶潛詩愛詩固自佳其如未忘機回頭四十年言動
俱成非誰能逐世利日久常規規惟當種溪田與子常
相期

少從白衫遊氣與山崢嶸一念隨文字腸腹期拄撐多
機天所災室暗燈不熒拈書枕頭睡鼻息春雷鳴泰山
與鴻毛何者為重輕蹄涔與渤澥誰能較虧盈如能平
其心一切當自平

嵩箕有奇姿出雲何悠然雲山足佳處留客今幾年有
子罷讀書求種山間田栗里愧淵明香山慙樂天二老
已古人相望雲泥懸得酒邀月來對影空自憐攝衣欲
起舞稚子不須牽

村居夏日

官府不著名散迹村落深白雲自朝暮青山無古今愛
此夏日永門巷多繁陰呼兒具繩牀不履亦不簪殷勤
好風來為我消煩襟一飽萬事了何用腰黃金羈勒困

名馬網羅多珍禽何如山鹿癡呦呦戀長林

宿少林寺

雙輪走雞棲下嶺分間道行行得精舍翠崦作迴抱諸
峰知客來故故顏色好征衫滿塵土慙愧方丈老殷勤
一瓣香為我除煩惱世緣如落花籬裊跡俱掃箇中有
佳處行脚恨不早一庵祖師傍異日親結草

晚出

坐久卧還起畏此夏日長出門髣髴蓬鬆西日明半牆鳩

鳴舍東柳雌和牆南桑十日暑煩苦一雨方論量偶然
釋憂抱露坐移繩牀羣兒莫相催老子便晚涼

衛承慶

感興

十日不出門出門春已好並山花更多十里紅未了朝
看花尚妍暮看花又老蔦紅隨危枝餘香寄芳草人生
祇如此百年疾過鳥安得脫塵寰游戲萬物表

王中立

中秋

素丸東溟來飛上玻璃盆聊揮五輪手撥去萬里陰印
透山河影照開天地心人世有昏曉我未嘗古今

張昌祚

題獻陵梁氏成趣園

富貴不可怙人多蹈危機清閒乃仙分塵世得者希高
哉隱君子不官無昨非城陰園日涉松茂竹圍肥彈棋
林樾映脩酒花枝圍文雉樂山澤樊中寧肯祈嗟予官

兩紀補益無纖微三徑亦奚暇家窘親朋譏空為慕遐
躅漫賦淵明歸

酈掖

題獻陵梁氏成趣圖

淵明恥折腰眷然歌歸歟雖云退身早田園已荒蕪日
涉三徑幽松菊滋繞廬豈知對魚鳥尚愧在迷塗梁君
早聞道浮雲視簪裾乃復慕淵明幽懷寄邨墟朝行雲
霞窟暮醉花月區尋梅雪沒屨倚竹霜粘鬚妙趣人不

識高風今昔無淵明如病人既病方被除大君千歲質
泰然一復初安得有龍眠畫此成趣圖

崔巍

題獻陵梁氏成趣園

人生政如寓光景不暫駐行樂當及時甘分隨所遇
何達者少往往利名懼白首縱得歸傷嗟已遲暮賢哉
樂城子此理能夙悟雅志慕淵明葺園日成趣乘興日
游涉蕭然唯杖屨柴門晝常關為無俗客故松竹交翠

蔭禽鳥弄清味風月四時佳如在山林佳壺觴但自引
琴書即心悟更向容安亭高卧談元素此生真足了覓
甚蓬萊路恨不見紫芝相約臨流賦

鄭輝

題海會寺以禪房花木深五字為韻得木字

吾儕愛山水乘興遊金谷修竹蔭寒泉層岩排古木風
軒盃暫把花院棋終局晚雨更多情留與成夜宿

李永安

題獻陵梁氏成趣園

淵明晉名流賢達早自悟一為折腰屈幡然賦歸去親
戚說情話園涉日成趣陳迹固已遠賞音者稀遇君獨
慕高節隱居事田圃亭軒喜幽靜綠蔭多佳樹三徑時
往還花香襲杖屨所適忻有得忘言心自豫榜園固無
愧古雅見風度顧我老將至區區猶仕路會當勇退歸
卜鄰就佳處

劉從益

過尉氏懷阮籍

朝來國門遊暮抵蓬池宿有懷阮步兵豪氣無撿束嘯
歌陟高臺長風振林木老眼何曾青四海無一物萬古
留詩名九原銷醉骨居然方丈家惜也微瑕玉塗窮道
不窮先生安用哭

汎舟回瀾亭坐中作

昔年醉回瀾猶恨身屬官今年邂逅來身與亭俱閒洗
心亭下水照眼亭西山溪山如故人喜我復來還有酒

澆我胸有花怡我顏
鞫鷹乍脫臂但覺天地寬
山陰忽回船夜闌情未闌

樂山松

樂山一何崇上有千歲松
清孤月露底秀拔天地中
蒲柳抱常質桃李開芳容
爭如十八公笑傲冰霜風
居然喜避世不肯汙秦封
蟠如北海螭伏如南陽龍
紛紛過者多匠石終不逢
明堂幾時構喚起蒼髯翁

和淵明雜詩四首

俗士苦紛競此心本無塵功名迺外物了不關吾身吾
身復何有形神假相親天地開一室日月挾兩鄰有生
即有化如晏之必晨但得酒中了亦足稱達人

揮戈欲却日小力自不量何如任天運閉門坐齋芳詩
書列四隅著我於中央夏卧北窗風隆冬曝朝陽但有
藜藿羹亦足充饑腸

少為饑所驅老為病所迫人生能幾何東阡復南陌急
須沽酒來一笑舉大白浩歌草木振起舞天地窄同歡

二三子誰主復誰客浮沉大浪中畢竟歸真宅

歲月去何速老炎變新涼遊子久不歸回首望大梁風
埃慘如此何處真吾鄉野菊明落日林楓染飛霜勸我
一杯酒悠然秋興長

和淵明始春懷田舍

家食自不惡菽水甘清貧學道未有得讀書亦良勤雖
勤竟何補俛首愧古人靜言閱世故來者日月新況復
抱沈疴百憂無一忻安得衛生訣益我華池津恍如一

夢覺不與萬法隣野人借問我恐是劉遺民

和淵明飲酒韻

日入了公事援琴洗塵喧秋堂一燈明清響到夜偏彈
罷枕書卧渺然夢青山山英向我問君駕何時還家僮
忽喚醒惆悵不能言

臘日次幽居韻

世路方擾擾人生何營營不如不出門坐頤天地情泰
中有否來陰極即陽生掀髯一笑起窗外風鐸鳴看雲

偶獨立踏雪時閒行最愛朝日升負暄向南榮

歲除夕次東坡守歲韻

人生都百年誰問鬪龜蛇容顏鏡中換老醜不可遮殷
勤守此歲來歲復如何南隣祭竈喧北里驅儺譁須臾
罷無為但聽樓鼓過明朝四十過暮景真易斜初心自
慷慨白首還蹉跎寄語少年子雖健不足誇

次韻別歲

一日復一日其來不肯遲一冬復一春既去誰能追問

歲果安往惜不知津涯常於歲除夕知是相別時隣翁
慣禮餞買酒烹鮮肥百挽不得留一別那須悲年年例
如此華髮吾何辭惟有學道心自覺老不衰

雷淵

雲卿父子有宛丘之行作二詩為餞

陽春到上林百卉紛白紅岸谷稍敷腴溪光亦冲融獨
有石間栢不落歌舞中期君如此木歲晚延清風

漢庭議論學傾耳待歆向君家賢父子千載蔚相望讀

書二十年閉戶自師匠異端絀偏雜陳言刊猥釀剛金
百鍊餘氣出諸老上顏風正波靡去去作隄障

同裕之欽叔分韻得莫論二字

幼安謝辟命子雲老寂莫趨嚮豈獨異時命非所度我
久困流離一屢求負郭雖無斬敵功尚舉力田爵崧少
啟吾封四履盡伊洛有客來問津醉眼入寥廓世事久
閉眼終日只睡昏清風何處來佳客已在門倒屣往從
之玉色向我溫妻孥趣作具歡喜傾瓶盆清夜襍被往

共就遺山元嘲謔及俳語發揮間微言懸斷漏天樞高
嘯驚鄰垣脗合正相和意到俄孤騫恨不倒困廩矧論
留籬樊棄屨獲珠玉披榛見蘭蓀我肱已三折醉隨偶
全渾知無適俗韻量力任灌園二君清廟器巾綦華壘
樽蒼生望休息朝廷待崇尊出處既異途會合難預論
此樂未易得此夕勿憚煩白酒舉初子黃雞溷諸孫水
樂喧後步山鬟秀前軒一醉萬事休商聲滿乾坤

會善寺怪松

物生自有常怪特物之病嗟嗟此老蒼怪怪生魁柄侏
儒蹙髀股宿瘤擁腮頸蜿蜒蛟龍戲騰擲猛虎競須髯
喜張磔意氣怒狂迸匠石求棟楹節目足譏評芻蕘急
薪槲堅悍空貯瞪靜言觀倚伏未易相吊慶雖違時世
用顧免斤斧橫陽秋莫榮悴歲月何究竟盤盤曲則全
挺挺獨也正小草悞掃迹伏神還守性儻隨天中景廣
宇共庥映

玉華山中同裕之分韻送欽叔得歸字

洗耳潁川水療飢西山薇山川得佳客草木生光輝末
路風教薄此道日已微相期千載事非君誰與歸

九日登少室絕頂同裕之分韻得蘿字

閒居愛重九佳人重相過登高酬節物少室鬱嵯峨迤
邐謝塵土夷猶出煙蘿欸如據鰲頭萬壑俯蜂窩浩浩
跨積風瀾瀾渺長河日車昇紅輪天宇凝蒼波指點數
齊州始覺氛埃多我無倚天劍有淚空滂沱驚鱗盼輿
渚倦翼占危柯悔不與家來結茅老巖阿歸途睠老阮

廣武意如何

月下同飛伯觀畦丁灌園得畦字

村居隣老圃喘汗憫夏畦
輓轡健晚涼月輪轉天蹊
剡金融溝涓涓冰泮溪黃萎
漸蘇息綠潤俄淒迷生意
續夜氣甘滋浹新萋風露觸
處香河漢望中低野人無
遠謀且喜豐食鮭雖愧下帷
董稍悟養生嵇歸懷自浩然
流光挹平西

濟南珍珠泉

大地萬寶藏元冥不敢私抉開青玉罅渾渾流珠璣輕
明疑夜光潔白真摩尼風吹忽脫串日射俄生輝有時
如少靳感沸却累累風色媚一川老蚌初未知君看一
日間巧厯所不貲遊人隨意滿不畀乾沒兒吾謂厯下
城繁華富瑰奇貪夫死專利帝意憐其癡故露連成珍
可玩不可樂若曰天壤間所遇皆汝資何必祕篋笥自
貽伊瑕疵詩成一大笑臆說量天機

李獻能

別馮駕之

東風弄微寒吹雪作輕陰春歸未得歸愁攬客子心與
君俱異縣那復重分襟感時復恨別老懷苦難任憶昨
滎陽會燈火語夜深縱談間俳語浩歌雜狂吟相期梁
宋游感君肯相尋西園偶差池市樓成孤斟相逢洧水
渚暫爾成盍簪燕鴻還別去又復如商參我行落日邊
匹馬獨登臨君方無定在倦翼思茂林人堪幾回別老
境各駸駸洧水不西流雙魚定沈沈幸有西飛鴻無吝

金玉音

追憶潁亭汎舟寄陽翟諸友

十月冬氣寒清霜殞羣木輕舟汎潁水微風吹野服信
流不知還石艇橫老玉苔花錦爛斑懸溜珠麗穀頗離
塵市雜倒瀉軒裳俗歲月今幾何春草淒以綠懷歸劇
飢渴仰羨雙飛鵠矯首九山雲迢迢傷遠目

邠城秋夜懷李仁卿

日入羣動息暝色陰濛濛故人隔潁水嫋嫋生秋風輕

風捲纖雲碧漢磨青銅坐久襟袖涼皎月生天東伊人
如此月霽色羅心胸可望不可親倏已駕飛鴻念此太
虛間心交神自通而況千里月相望寧不同孤光透薄
帷儼如接音容翻翻繞枝鵲唧唧侵堦蛩上牀轉不寐
高樓待晨鐘相思夜何永月落秋牀空

王渥

三門津

層崖摩蒼穹四月號陰風大河三門險神禹萬世功他

山亦崔嵬砥柱獨尊雄雷霆日鬪擊悍暴愁天公劉侯
智有餘始令舟楫通仍餘石上穴飛棧曾連空遙瞻白
玉枝挺植丹竈中仙公去不返此事真冥濛夫人與鼓
崖怪幻尤難窮獨喜兵火餘歸然出新宮當時疏鑿意
四海要會同誰知千歲後築壘防嘯克詩成一大笑浩
浩洪波東

張本

得王子正書

晨鵲何處來飛鳴向前除故人在天涯遺我尺素書為
言長相思夢寐同所居所居亦靡他上論揖讓初覺來
獨愴然澹月留太虛蹇予臨末路世味皆泊如一學未
敢輟尚念客氣粗切磋與琢磨政恐朋友疎自從吾子
東門之長者車發揮天人奧大辯孰起予丹陽何高明
吾子昔所廬南軒拂翠筠北潭照紅蕖蝗害非不虐子
食豈無餘灤江固自佳何堪曳長裾春風旦夕至歸哉
莫踟躕

寄弟

離離丘壟田鬱鬱霜露思相隔二十年旦暮一何悲中
途涉萬里天幸復來歸燕安此懷居愧彼神與祇叔兮
孝且友見義能不疑上念先塋孤亦閔乃兄癡護喪營
大葬勤苦我所知昨朝尺書來殷勤咸及茲燈下展轉
讀涕淚沾裳衣父祔失臨穴子烏庸我為我非羽毛寄
飽食冥然飛田居有素懷行當事畬菑與子奉遺祀沒
身以為期

郭邦彥

讀毛詩

含氣有喜怒觸物無不鳴天機泄鳥迹文字從此生誰
言土葦器聲合天地清樸壤犧氏瑟巧露媧皇笙末流
不可障聲律隨合并徧讀蕭氏選不見真性情怨刺雜
譏罵名曰離騷經頌美獻諂諛是謂之采銘詩道初不
然自是時代更秦火燒不死此物如有靈至今三百篇
殷殷金石聲漢儒各名家辯口劇分爭康成獨麾戈諸

儒約連衡祭酒最後出千古老成精我欲讀爾雅不辨
螯蟹名尚憐沈謝輩滿篋月露形孔徒凡幾人入室無
長卿三子論性命舉世為譏評白首草太元才得覆醬
罌不知匡鼎說愈笑人愈聽

秦略

拳秀峰

平滑石之俗其俗資磨礪磊醜石之秀其秀在醜中正
如古丈夫貌寢氣質雄又如聖人心孔竅虛明通大都

一拳許含蓄華與嵩大巧本若拙足見造化功好處元
更多摹寫不易工君其善調護抵擊防兒童

白髮

臨水時自照照我鬚與睂鬚睂何所似恰似純白絲從
茲一白後寧有再黑時譬如花落地不復還故枝殷勤
語鬚睂聽我自解詩幼小癡讀書既壯多憂思自苦有
冰蘖自潤無膏脂勞生到今日汝白將何辭

劉昂霄

游五渡谷

南山如碧環缺處蒼崖開當年造物手辦此何神哉
睥睨倚天壁千古封莓苔源源萬斛泉飛出重山來
白龍三百丈行處鳴春雷巨石若棟宇磊砢相推排
跳波與濺沫餘怒猶喧豗我來值杪秋萬壑風聲哀
黃花雜紅樹錦繡紛巖隈奇勝宿所貪欲去仍徘徊
題詩還自笑愧我非仙材

張璪

送侯道士

十年走南北黃塵汚人衣
翩翩夜啼鳥一枝無可依
問君何所如鳬鳥東南飛
恨我不得往失脚穿與機
從君知不能一笑人間非
何水無蒲魚何山無蕨薇
終當拂衣去往叩雲山扉

高永

跋賈天升所藏段志寧山水

蒼壁雲氣湧長松風雨寒湍流
擘山出玉虹飲溪灣胸

中無雲夢筆底無江山想見破墨初布袖蛟龍蟠壯觀
駭心魄萬象本自閒寒齋靜相對遠意空追攀

麻九疇

彈琴懷山中人

門前雪垂垂室中理朱絃手按十三徽心飛天一涯故
人渺何許萬里驚鴻飛試憑朱絃語一聲聲亦悲一彈
雪欲落再彈雪正作只在此山中故人今憂樂我欲彈
文王岐山雲渺茫我欲鼓曾子無田可耘耔道遠望不

及千山復萬水思君復思君正恐鬚髯皓后夔若不來
柰此宮商何春風早晚起百鳥喧庭柯時攜一尊酒為
君奏雲和

和伯玉食蒿醬韻

九尺東方生不如一侏儒飲啄各有程厚薄與生俱文
蒲及屈芟何乃澹以枯正如謝三旌甘心作羊屠伊蒿
本新材豈足充庖廚薄雪草堂徑新霜古城隅河南地
差暖冬有不死蕪青來澗邊篁綠入几上盃微香能侶

菊小苦賢於荼酷烈變醯醢薰醲破脂酥書生喜倒說
食亦變精麤借問冰茶者何如羔酒乎況爾蓼彼蕭蓬
茅固其徒偶然躡一等遽欲忘樵夫邇來歲頗饑大半
殢在途攘肉或至犬首丘不如狐命賤祇求死計窮交
議逋尚有紈袴兒朝夕食於株寧知掃野稗一飽不易
圖遂令人輕生不畏鎖與鈇如君有蒿醬猶是千金軀

復次韻

五臟太多可張頤託臞儒自非何曾家安得海陸俱莊

周章有粟不至魚肆枯何勞夷門市下車朱亥屠春韭
與秋菘歲晚不供厨蒿腹不蒿目大方果無隅為醬非
負口猶勝范菜蕪豈無青精飯駐顏炊一盂豈無菖蒲
歟辟邪如神茶又豈無椒花除瘟等酴酥蒿於數品中
頗同武官麤數品雖異饌置之醬可乎猶材各有施豈
必皆吾徒公綽優為老劣於滕大夫大抵食如士取之
非一塗君詩誌其味食經有董狐彼哉黿羹指斲棺終
莫逋彼哉萍蘢手竟死珊瑚株寧如醬以蒿不出本草

圖蓋後人好奇一洗腥砧鉄為謝饒崇鬼渠今離我軀
翌日又為履道所戲其意似欲窮我技再和前

章書呈伯玉

敢可為炙啖博哉釋草儒柰何騷人詠不與蘭茝俱青
青發陳荑嫩勝穉生枯面柔似張禹氣冽如申屠忽逢
易牙口一日登君廚君兄昔在日作事太廉隅宦游三
十年不治一室蕪嘗載米之郡政如置水盂不義獲八
珍棄之猶堇荼相對話終日茗椀無鹽酥見客惟恐遲

遇飯不擇麤無食但有名窮不亦宜乎我本寒素士卧
雪袁司徒臭味偶相似豈是敦薄夫見君食蒿醬取嘲
於仕途和君蒿醬詩緼袍隨衣狐詩醬兩情苦此債無
由逋蒿荻無棄材柰此蒼松株何當列銅甕一依饗禮
圖唯聞廣廷樂不見轅門鈇此日雖無醬猶堪養羸軀
元裕之以山遊見招兼以詩四首為寄因以山
中之意仍其韻

石華政可採負我孤舟蓬胡為紅塵裏擾擾槐安宮山

問綠蘿月一照千巖空洪崖去不返清游誰與同空餘
松根泉雜佩流無窮人心隨泥滓不如與天通舉頭視
霄漢浩露洗心胸

日月兩角蝸天地一粒粟老盆可徑醉豈擇瓦與王大
笑區中人朱門丐梁肉清曉登少室日夕眺王屋紫煙
晞吾髮碧霞貯吾腹溪中有白雲萬事付濯足物物愜
幽情不獨蘭與菊

南風入桂樹高葉碧崢嶸舉手戲攀折上與雲煙撐黃

金間白玉遍地先晶瑩笙簫坐間發鸞鶴空中鳴浩歌
山谷應起舞衣裳輕一尊石上酒如我浩氣盈目送飛
鴻盡青雲萬里平

國風久已熄如火不再然流為玉臺詠鉛粉嬌華年政
須洗妖冶八駿踏芝田青苔明月露碧樹涼風天塵土
一一盡象緯昭昭懸寂寥抱玉辨爭競搖尾憐幸有元
公子不為常語牽

雷瑄

信陵館酒間二首

閒過信陵飲有懷信陵君君去日已遠誰憐抱關人徑
攜一壺酒往酹公子墳墳科久已平墓木幾為薪泉扉
鎖長夜千載不復晨昔與賢俊遊今為狐兔隣豪貴竟
安在念之心紛紜有生會歸盡但恐後無聞此意不可
必且醉梁園春

維昔有迂叟樹桐彼高岡殷勤為封植遂欲棲鳳凰桐
生日已長鳳來殊未央惟鳳覽德輝非時詎來翔枝幹

枯以死志願終莫償憶在西周初飛下岐之陽裴回不
能去和鳴聲鏘鏘文王既已沒千載徽音亡咄爾叟何
為而欲發其光空令枯株上日晏啼鵲鷦

古意四首

美人傷獨宿窈窕春閨深素手卷翠被當窗調玉琴危
絃奏苦調清歌抗哀音絃絕歌復咽起作薄命吟妾如
朱槿花含英愁晏陰郎如青銅鏡照面不照心不怨不
照心但惜飛光沈且留連理枕莫捲合歡衾儻君回餘

輝歡盟尚可尋

對酒不能飲拊劒自度曲一唱行路難歌與淚相續朝
為楊朱泣暮作阮籍哭古道盡荆棘新蹊苦蕒菜曲行
違吾心直行傷吾足曲直無適從昂頭羨鴻鵠

綿綿兔絲草濯濯檉樹枝結根偶相值引蔓纏綿之春
風一披拂柯葉含榮滋弱質附美蔭百齡誓不違清商
忽用事霜飈已淒豈意百尺條同此春草萎委蔓失
所托憔悴徒傷悲知君無歲寒何用相因依

賢王悲墜屨賢婦念遺簪重在不忘故微物何所欽嗟
我昔遊友雲路揚徽音詎念夙昔好棄擲各飛沈昔如
膠投漆今如辰與參桃李雖成蹊諒無松栢心

李汾

雲溪曉泛圖

曉景淡明月落影潭西丘晴川挂煙樹光拂雲河流楓
林入行色關山生白頭羨羨畫中人憶我秦川游君帆
渺何許儻下滄浪洲滄浪吾有約寄謝同盟鷗

李夷

古鏡

盤盤古皇州夢斷繁華歇一鞭春事忙耕出隴頭月土
蝕背花暗蹄泔駭龍蹲鬚髯怒欲張縮手不敢捫星環
紫極位劍外十三字細看清用文

其篆文云真漢君墓誌
為清日用

壽堂鎖菱花引得阿紫家榛煙夕霏時幾照拂雙鴉神
物污難久一日落吾手壽光閱人多常有此容不呵呵
吾戲云雅志踵先民鏡裏春風面泉下今日塵九原不

可作哲弟師有若摩挲一面銅便有親炙樂

王元粹

春日

時年十八

春日何慘慘春雲何陰陰桃李都未花況乃餘寒侵久
在 cities 居而無人見尋讀易了一編靜見天地心貧士
寡徒侶古來非獨今

葉縣贈李長源

相見各異縣歲暮風霜清三日同眠食深見故人情借

問何所歷大梁與秦京悠悠川途永冉冉歲月傾子當
東北馳予亦西南征人事相羈束何時當合并聊斟昆
陽酒為澆胸次平出處固難必勉哉崇令名

西山避亂三首

蒼山多回互四望令人迷過午日已暖殘雪融為泥路
滑不可進弱葛愁攀躋老幼委溝壑不如犬與鷄嗷嗷
同行子手中各有攜汲澗為飲食架木為巖棲夜半三
四驚翁媪禁兒啼念我長病母亂離隔東西

野宿不得曉飛霜沾敝袍空山凝寒色天邊星月高憶
昨離鄂城數家同遁逃穿林恐相失前後聞呼號避亂
但欲遠焉知登頓勞俯臨萬仞壑性命輕鴻毛

青青道邊麥知是誰家田山田固已薄榛石復相連旁
有破茅屋日入不見煙借問舊居者聞亂已西遷平生
苦淪薄對此增慨然甲兵暗宇宙誰能安一厘愁憂無
從訴仰面視蒼天伐木南澗底雙鹿過我前

還鄂城舊居

四月六日作

南風兵塵遠病客返舊居入門顧西壁書籍亦無餘數
口共嗷嗷日事將何如屋破未暇葺草滿須當鋤昔去
季冬末今來孟夏初深愧資用絕時時煩里閭

馮延登

德順道院隴泉

玉壘制方維瓊漿閔仙宅何人劖雲根一旦泄地脉金
匱鎖龍漿月窟逗蟾液銅壺漏水清玉斗天醴碧光搖
日千道影落天一席窈然仇池穴自與天壤隔

登封塗中遇雨留僧舍

溼雲若煙低飛雨如矢集近山衣已涼薄寒復相襲
景涵草木秋意滿原隰林紅寒更殷山翠晴更溼不知
高幾許但見蒼壁立羣峰誰暇數庭筍紛戢戢騰擲來
眼中左右疲顧揖

李俊民

游碧落并序

壬寅重午日陪郡侯段正卿暨王用亨劉漢臣濟

之君祥仲寬姚子昂張唐臣祿卿平陽趙君玉王
潤之同行

浮雲翳炎景長夏愜幽事相陪林下友共造金碧地清
流漱寒玉老樹聳蒼翠何人開山祖妙處發天祕悠悠
歲月深剝落磨崖字遨頭興不淺有酒留客醉幽鳥背
人飛不慣聞鼓吹抵暮出山門溪風送歸騎

御選金詩卷三

謹案第二十五頁後三行叔兮孝且友刊本兮作

子據中州集改





總校官庶吉士臣侍朝

校對官檢討臣蕭九成

謄錄舉人臣張昱